



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Virat Kohli Test cricket asaya nungi anisüngzüker

US o China tayang kepzüktepba tariff shilem 115 ajemtsü

VOL. XXII ISSUE NO. 208 (ADOK 208)

DIMAPUR

SANGTENNÜ (TUESDAY)

MONUPII (MAY) 13, 2025

₹ 5.00

Assam panchayat elections nung BJP-i takok tulu angu

Guwahati, May 12, 2025 (Agencies): Assam Panchayat elections nung Bharatiya Janata Party (BJP)-i takok tulu nguogo aser talisa Jorhat, Biswanath, o Morigaon district tem nung parnoki takok tajung angu.

Hombar aonung 7:00 ako nung osang agütsüba tashi nung BJP aser parnok den yariteper Asom Gana Parishad (AGP) ajanga Zila Parishad menden 397 nungi 307 nung takok anguba metetdaksüogo.

Congress-i menden 62 aser tanga party den independent candidate temi menden 28 nung takok ngutetogo.

BJP-AGP teloktepi Anchalik Panchayat menden 2,192 nungi 1,409 nung takok ngutetogo. Congress-i menden 122 aser tangari menden 41 nung takok nguteta lir.

Congress-i tesem aika nung tamakok nguogo saka Motirchar, Dhubri nung parnoki maneni takok angu.

Jorhat ya BJP jenjang ajungba district ka lir aser Zila Parishad menden 16 nungi 15 nung parnoki takok nguogo. Tanüngba menden kaji BJP den yariteper Asom Gana Parishad (AGP)-i angu.

Jorhat nungsa Anchalik Panchayat level nung BJP-i menden 86 nungi 72 nung takok

angu. BJP zülen AGP-i menden 10, Congress-i menden 3, aser Independent candidate kati menden ka nung takok nguteta liasü.

Congress tanishir Gaurav Gogoi-i Jorhat nungi Lok Sabha election nung takok ngutetaka BJP jenjang junga aliba iba results ajanga sayur.

Biswanath district nunga BJP-i Zila Parishad menden 12 prong nung takok angu aser Anchalik Panchayat menden 73 nungi 59 nung takok angu. Tanüngba menden nungi AGP-i 4 aser Congress-i 3 nung takok angu.

Morigaon district nung BJP jenjang kanga junga kümogo aser District Council menden 4 nung takok angu. Bhurbandha aser Kapili amala village & regional panchayat elections nung BJP candidate temi takok teimba ngutetogo.

Ajisüaka, Dhubri district nung Congress-i takok tajung angu aser ibaji parnok candidate Baby Begum-i votes 5,692 agi Motirchar Zilla Parishad nung takok anguba lir.

May 2 aser 7 anogotem Assam kübok district 27 nung Panchayat elections agia liasü. Vote enoktsür 74% temai polling stations 25,007 nung votes enokja liasü.

Arunachal lanur ka ashiokja Myanmar junta army atema raradaksü

Guwahati, May 12, 2025 (Agencies): Arunachal Pradesh nung lanur aika United Tani Army (UTA) nung züngsem aküm aser iba sülen Myanmar nung armed training atema ao saka parnok ashioktsü.

Arunachal Pradesh Police-i item lanur kar tsüngsü bushitetogo aser parnok meyipa anir arutsü atema yariteper.

Arishi küm lanur ka shiba dang 'X' ta ajar, pai Tana Hasi den metetepa aküm. Hasi ya taküm küm tetenzüklen ketdangsürtemi puogo. Pai UTA nung lanurtem mesüzüka aniok.

Senotsü tsütsü timtem ajuruba aser mapa manguba agi X ta asüba lanuri UTA nung züngsemba ajanga pa tarutsü jenjang tajungba akümtsü ta maongka agia adentsü mulunga agizük.

2023 tatemlen UTA nung nisung aniokertemi X aser tangar ana Changlang district ajanga artsü adena anir ao. Idakji parnok NSCN (IM) züngsem Absolom Rockwang lenisüba kübok training facility kati anir ao.

2019 Khonsa nung nisung 11 tepsetba nung Rockwang-i shilem agi ta National Investigation Agency (NIA)-i tai tonglokja lir. Iba lendong nung

asürtem rongnung MLA Tirong Aboh densema liasü.

Osang angazükba agi UTA chairman Anthony Doke-i Rockwang den tesentaktep tajung lir.

X aser lanurtem anogo ishika training agidaksüba sülen UTA züngsemtemi X ji Myanmar kübok Sagaing region nung raratsü atema yok. Parnoki tashiyim agi X ya junta army atema raradaksü aser parnoki People's Defence Force (PDF) den rara.

UTA züngsemtemi X indang phone rakzüka bener ao aser pai tangar den tongteprateptsü mekoki aküm.

Rara tuluba akümba den X-i ki menungraa ait aser iba jagi pai jena aotsü lenmang bushitsü tenzük. Tatemsa November 2024 nung pai jena arutet.

Pa ket nung jang seret tera aser amtsük kar bener anogo tenet tashi arem-min nung jajayonga aruba sülen Manipur kübok Ukhrul district atong. Idakji pai Arunachal nung nisung kar den tongtep aser kidangi meyipa shilang.

X-i tang security agencies den amalitepa yaritepdar aser UTA nung züngsem akümba atema kanga sasaa bilemba metetdaksüogo.

Chakhesang kaketshirtemi NH-29 nung gari kar noktanger



Kohima, May 12, 2025 (TYO): Chakhesang Students' Union (CSU)-i NH-29 stretch, talisa Chakhabama-Kikruma Package-II section nung NHIDCL, M/S Ratna Infrastructure Project Pvt. Ltd. aser sorkar garitem mesenzüdaksüi noktangsü tenzükogo.

"October 16, 2024 nungi May 11, 2025 tashi mapang peria agüjaka National Highways & Infrastructure Development Corporation Ltd (NHIDCL) aser M/S Ratna-i mapa meinyakba atema onoki mapang telatet makai lungkak aitsü tenzükogo" ta CSU president Pfhulo Sara-i ashi.

May 2, 2025 nü CSU-i anogo tenet züngzüksü saka idangjia

telangzüba kecha magütsü aser May 10, 2025 nü Kikruma village nung timi lungkak aitba sentong ka agia liasü.

Ajisüaka, CSU-i shiditem züluba aser lungkak aitba sentong ayonga agiaka NHIDCL aser M/S Ratna ajanga parnoki nangzükbä ama meinyaktet aser iba ajanga senzüsenbongertemi timtem kanga ajurur ta Pfhulo Sara-isa ashi.

"Telok anaprongi onoki akhangba ama meinyaker anungji onoki mapang telatet makai lungkak aitsü tenzük. Iba ajanga timtem kar danga ajurura NHIDCL-i tebilemtsü khuret ajunga abentsü" ta paisa ashi.

Kikruma kübok 29-km

Package-2 stretch nung lenmang mejungi alidak volunteers yuja lir ta paisa shisem.

Tanü NH-29 Chakhabama-Kikruma Package-II stretch nung CSU-i NHIDCL gari 3 aser government-registered gari ka puogo.

Ajisüaka, iba tenokdangba kübok essential services, including medical, administrative, police and paramilitary forces, fire and emergency services, power aser PHE department staff madener.

Onoki akhangba ama meinyak tashi lungkak aitba manentsü aser ajaki iba tetuyuba sülen anidaksü ayongzüker ta CSU-isa metetdaksüogo.

Indo-Pak rara: Manipur BSF constable'er kibong nem teyari agütsür

Imphal, May 12, 2025 (Agencies): Indo-Pak arrtsü mangatettep nung taküm bendanga agütsür BSF constable Deepak Chimngakhham nem Manipur-i tetushi agütsür.

Manipur Governor-i Deepak Chimngakhham'er kibong nem Rs 10 lakh teyari agütsütsü ta Hombarnü Raj Bhavan, Imphal ajanga metetdaksü.

Constable (General Duty)

Deepak Chimngakhham (25) ya 7th Battalion, Border Security Force (BSF) nungi liasü. May 10, 2025 nü Pakistan nungi yokba drone kati Kharkhola Border Outpost (BOP) amakdang pa asü.

Constable Chimngakhham ya Imphal East district nungi bendanga agüja tenzükba sepai ka liasü.

Mongulbarnü Bir Tikendrajit International Airport, Imphal

nung pa nem akhüm tetushi agüja naro yutsüba sentong ka agitsü.

Iba sentong nung Manipur Governor dena tongtipang nisungtem aika adentsü.

Külen, Manipur sorkaria Major Laishram Jyotin Singh Ashok Chakra (P) Scheme kübok asür Constable Chimngakhham'er kibong nem Rs 10 lakh teyari agütsütsü sangoktsüogo.

Manipur political party 15-i census aser delimitation magizüker

Imphal, May 12, 2025 (Agencies): Manipur nung political party 15-i Governor Ajay Kumar Bhalla dang census maparen nung tim masüba aliba atema tebilemtsü abenba lemsatepogo.

Parnokisa 2001 census data nung ajemdaker delimitation exercise agitsü aliba magizüker ta metetdaksüogo.

Hombarnü Raj Bhavan, Imphal nung senden ka amendang National People's Party (NPP), Janata Dal (United), Communist Party of India (M), Aam Aadmi Party (AAP), Nationalist Congress Party

(NCP), Nationalist Congress Party - Sharadchandra Pawar (NCP-SP), Revolutionary Socialist Party (RSP), Republican Party of India - Athawale (RPI-A), Shiv Sena (UBT), Manipur People's Party (MPP), aser Bahujan Samaj Party (BSP) teshimtet nübotemi Governor Bhalla nem shidi ka agütsü.

Supreme Court-i tawa tu Centre dang ita asem tsüngda Arunachal Pradesh, Nagaland, Manipur, aser Assam nung delimitation asütsü tetuyuba agütsüba atema Manipur nung political party 15-i tebilemtsü

abenba metetdaksüogo.

Manipur political party temi iba tetuyuba magizüker aser 2001 census nung ajemdaker delimitation asübaji tim masü aser iba ya nübotemi magizüksü ta metetdaksüogo.

"2001 census nung ajemdaker delimitation mapa tenzükra nübotemi iba anema lungkak aitsü" ta NPP State unit president aser taoba Deputy Chief Minister Y Joykumar-i ashi.

Parnokisa Supreme Court dang Manipur nung delimitation maparen sota atatsü temepishiba ka agütsütsü ta metetdaksüogo.

Kohima nung BJP ketdangsür ana NPCC dangi meyip



Dimapur, Monupii/May 12 (TYO): 9th Kohima Town Assembly Constituency indang BJP tatong tir Vitoka Tsuqu aser 9th Kohima Town Assembly Constituency indang Mahila Morcha tir Hovili Aye na Congress dangi meyipa aruba pela agizüker, ta Nagaland Pradesh Congress Committee (NPCC) sangdong ka ajanga ashi.

Lenir ana ya pela agizükba sentong ka May 12, 2025 nü agia liasü, kong MP aser NPCC tir S. Supongmeren Jamir, NPCC Working Presidents Khriedo Theunou aser Apok Jamir, Kohima District Congress Committee indang working president aser 9th Kohima Town Assembly Constituency Congress Committee tir densema Congress workers tem

dena liasü.

Tsuqu aser Aye na grassroots jenjang nung tajangshiba bener Nagaland nung party tali tashi aittsü imlar, ta NPCC sangdong ajanga ashi.

Indian National Congress indang lenisüba kübok nübur tejangraba tejakleni bener aoba nung parnoki shilem tajung agitsü imlar, ta sangdong ajangasa ashi.

Chümoukedima DPDB senden menogo

Dimapur, Monupii/May 12 (TYO): Ita shia amenba Chümoukedima District Planning and Development Board senden May 12, 2025 nü DPDB Conference Hall, Chümoukedima nung Advisor, Urban Development and Municipal Affairs, Zhaleo Rio lenisüba kübok mena liasü.

Taoba senden nung lemteta aliba lepa reprangshia senden tenzük aser iba sülen Chümoukedima DPDB Chairman & Advisor Zhaleo Rio aser Advisor, Industries & Commerce, Hekani Jakhalu Kense nungeri pela agizükba o jembia liasü.

Senden nung Board ajanga Yimkhiung Soritsun Women

Cultural Society, Forerunner Nagaland Foundation, Diphupar Village aser Block-5 Welfare Society, Thilixu Village society registration indang jembir temaba ketdangsür dangi yoka liasü.

Ajisüaka Riverine Educational Society, Thilixu Village aser Sumi Baptist Akukuhou Society, Diphupar Village society registration indang taruba DPDB senden nung jembitsü lemtet.

Iba senden nung DIPR Office, Medziphema Sub-Division upgrade asütsü, Chümoukedima district nung District Welfare Officer (DWO) amenoktsü, Medzhiphema nung

Fire Station temeja amenoktsü atema jembir recommendations agüja liasü.

Iba sülen Nodal Officer, DDMA, Rendemo-i PowerPoint presentation agütsüba mapang disaster preparedness status, structures, action plan aser monsoon preparedness plan amala inyakyim lemsatepa liasü.

Monsoon preparedness dak sendakba nung lokti nübuttsük sentong ka May 17, 2025 nü ayongzüksü senden nung lemteta liasü.

Taruba DPDB senden nung District Child Protection Officer ajanga department inyakyim indang lemsateptsü nungloksür senden tembang.

Shidak maliba school tem nem tatok magütsütsü: MLA Achumbemo

Dimapur, Monupii/May 12 (TYO): Bhandari Sub-Divisional Planning and Development Board (SDPDB) senden May 9, 2025 nü Summer House cum Guest House, Bhandari, Wokha nung amendang, shidak maliba kaket reju tem nem tatok magütsütsü, ta MLA & Chairman, SDPDB, Bhandari, Achumbemo Kikon-i ashi.

Kikon mendenpuba sür iba senden amendang pai Bhandari nung ketdangsür tasentem pela agizük aser Bhandari sub division nungi HSLC aser HSSLC examination 2025 nung toppers asem nem tenüngsang agüja liasü.

Nagaland Seed Farm, Merapani nung terenlok maparen lepa reprangshiba mapang, state meyong Seed Farm ya Nagaland meyong lir, anungji Nagaland State Seed Farm nung mangatettep kar adokra kangasa tia maka asütsü, ta MLA Achumbemo Kikon-i ashi.

State Seed Farm nung aliba ali dangar nem mamshidaktsütsü indang jembidang, asen land security nung ajemdaker temulung melemtettsüsa nisungtem nem farm land ya mamshidaktsütsüla aser ibai Nagaland state ajunga aser alema oa aliba state tem asoshi

'rice bowl' tongtipang ka kumdaktsütettsü, ta pai ashi.

Nüburtemi shimtetba züngsem ka asünungji, akhi mapang nungi state meyong ali agitsü asoshi ozüing alema mera agira, nungnanga melie kumzüka ayutsü aser anema nokdaksü, ta MLA Achumbemo-i ashi.

Bhandari sub division kübok kaket rejutem nung nütsüing arentsü, tesayur temi shisaliok tajungba nung agütsütsü asoshi rangloker yimya balala amshia aser ajungshitepa inyaksü head of schools tem dang ayongzüka liasü.

MLA Kikon-i head of schools tem senden nung adentsü ayongzüker aser non-performance school tem asoshi tatok malitsü ta ashi.

Ken o tatsü-talang ajak jembir GMS Yampha Old nung tesüiba küm asem tashi classes 6, 7 aser 8 nung enrolment kata maliba yong GPS dang down grade asütsü senden nung jembia liasü.

SDEO Mangkolemba establishment nungi school trok - GPS Akahuto, GPS Akuhaiqa, GPS Aghautito, GPS Khakuthato, GPS Methiher aser GPS Zuxeshe - transfer asüba indang jembidang 2020 kOm sangdong ka agütsüba sülen item school ya EBRC Bhandari dangi

transfer süogo, saka tang tashi SDEO Mangkolemba ajanga ketdang asür, ta Deputy Director, Y. James Humtsoe, Incharge of SDEO Bhandari ajanga metetdaksü.

Iba dak sendakba nung item school ya Bhandari sub-division administrative kübok lir asünungji SDEO Bhandari küboki aiddaktsütsüla, ta iba senden nung jembia liasü.

Memonui item school ya SDEO Bhandari küboki aiddaktsütsü asoshi nungdakba mera agitsü atema department dang ashitsü lemteta liasü.

Baghty division kübok Foothill Road yangluba osang Er. C. Tungoe, SDO PWD (R&B) ajanga iba senden nung agütsüdang, apu yangluba ka dak alaka tanünga pongu imlaba ama inyaktar, ta metetdaksü. Tesem kar nung lenmang atoba aser ulushiba mapa inyaktar, ta paia ashi.

JE Power ajanga Merapani 33KV line dangi 1.6 MVA Power Transformer belenba osang agütsüdang, physical aser manual mapa ajak renemogo ta ashi.

Final installation atema Power transformer ajungkettsü asoshi Hydra ka nungdaker, ta JE ajangasa shia liasü.

NSCN/GPRN ajanga Toyota Innova kanguteta lir

Dimapur, Monupii/May 12 (TYO): NSCN/GPRN ajanga sangdong ka nung, Toyota Innova (White) ka nguteta lir, ta metetdaksü.

Iba gari indang Chassis Number ya MBJAB3EM4025207920418

alitsü, anungji kiburi iba gari ya hopta ka tsüngta arua meshitsü metetdaksür.

Latettsüba mapang nung mashishira, GPRN/NSCN ketdangsüri gari/kibur anema mela aliba mera agitsü, ta sangdong ajanga ashi.

NSCN/GPRN-R (Akato) züngsem ka nem anisüngzüker agütsür

Dimapur, Monupii/May 12

(TYO): NSCN/GPRN-R (Akato) ajanga sangdong ka nung, medical ground nung GSO-1 (Admin) Naga Army, Brig. Jack Chophi-i meyongnem agütsüba ama Hoito yimtsüng nungi Kughaho Chophi'er jabaso Major Ato Chophi nem anisüngzüker

agütsür, ta ashi.

Linük asoshi pai mulungsoa shilem tajung agiba atema NSCN-i pelaba lemsateper.

Major Ato Chophi tekeraba nung taneptsü ngua tarutsü wadang nung temoatsü alitsü imla atar, ta NSCN/GPRN-R (Akato) indang sangdong ajangasa ashi.

EDTC kübok Construction Permit mali ki meyanglutsü

Dimapur, Monupii/May 12

(TYO): Jurila aser commercial developers densema nübur ajunga dang East Dimapur Town Council jurisdiction kübok EDTC office nungi jelia Construction Permit meshir ang talitsü asoshi mesüra commercial asoshi ki o jen yanglutsü metetdaksür, ta East Dimapur Town Council sangdong ka ajanga ashi.

EDTC administered area nung 'regulatory framework governing urban planning, safety standards' aser yimya shidak nung ki o jen yanglutsü asoshi iba totuyuba ya agütsür.


Ki o jen tang teyangludak

mesüra yanglutsü aliba atema anogo 15 tsüngta EDTC office nungi nungdakba permit ya agitsü metetdaksür, ta ashi.

Iba totuyuba sülen manidaker nem temerenshi agütsütsü, ki o jen yangluba anendaktsütsü mesüra ozüing agi melaba mera agitsü.

Anungi nübur ajungai iba sangdong sülen anidaka municipal laws nung aliba ama inyaka asen jila tajungtiba nung yangerba nung shilem agitsü ayongzüker. Maneni osang tali jangjatsü mesüra yariteptsü asoshi EDTC office den tongteprateptsü akok, ta sangdong ajangasa ashi.

Mkg nung International Nurses' Day 2025 amung



International Nurses' Day sentong ka Multipurpose Hall, SON, IMDH, Mokochung nung May 12, 2025 nü agidang Principal, School of Nursing, IMDH, T. Temsusenla Aier-i iba sentong nung jembiba noksa nung angur.

Dimapur, Monupii/May 12

(TYO): Multi-Purpose Hall, School of Nursing IMDH, Mokochung nung May 12, 2025 nü "Our Nurses. Our Future - Caring

For Nurses Strengthens Economies" omen nung ajemdaker International Nurses' Day mungogo.

Iba anogomung omen nung ajemdaker o jembir Principal, School of Nursing, IMDH, T.


Temsusenla Aier-i nurses ajunga dang iba noble profession nung bendanga

agütsüshitsü ayongzüker aser Health Care Institution ajunga nung nurses tem ya tongtoret lir ta ashi.

Laisa nurses tem tekolok shisatsü aser temang anema alitsü aser mapa inyaba tesem tajung asütsü tongtipang ta ashi.

Shilula Imchen, Associate Pastor Women, MTBA ajanga tayongzüker o jembidang nurse tem mapa ya Yisu indang mapa den mesükteper aser nurse ka dak shirangertem taneptsü angutsüsa yimya aser sempet tajung alitsüla ta ashi.

Pakistan-i asen schools aser tekülem kitem amak: PM Modi



May 12, 2025 nü New Delhi nung Ato kilonser Narendra Modi leniba nung Defence Minister Rajnath Singh, External Affairs Minister S Jaishankar, National Security Advisor (NSA) Ajit Doval, Chief of Defence Staff General Anil Chauhan, Chief of Army Staff General Upendra Dwivedi, Chief of Naval Staff Admiral Dinesh K Tripathi, Chief of Air Staff Air Chief Marshal AP Singh aser tangartem senden ka amendang tangokba noksa nung angur.

New Delhi, Monupii/May 12 (Agencies): India aser Pakistan na tsünga rara tenzükbä sülen tang mezünga Hombar aonung linük nüburtem den jembidang Ato kilonser Narendra Modi-i, kiralongra tatalokba bushisüngdangba nung yariteptsü melen Pakistan-i asen school tem, college tem aser tekülem kitem ang amak, ta metetdaksü.

"Asenok den amalitepa inyaksü melen Pakistan-i asen school tem, college tem aser tekülem kitem amak tenzük. India-i Pakistan nung airbases raksatsüogo," ta pai metetdaksü.

Modi-isa, India-i meyiper amakba ajanga Pakistan nung tanela raksatsü, ta ashi.

"India-i iba ama telemtetba agia inyaksü, ta kiralongrartemi mebilemi liasü. India nungeri missiles aser drones amshia Pakistan nung tesem balala amakbaji kiralongrartem kiojen raksatsüba dang masü saka parnok tasütait tanela-a raksatsüogo," ta pai ashi.

"Kiralongrartem samatsütsü atema onoki Indian army nem tashi ajak agüja liasü, aser tanübo kiralongrar ajak aser kiralongrar organisation ajaki asen aianu aser jalatem tenütsü nungi 'sindoor' aidoktsüba taaji

kechiar metetogo," ta pai ashi.

Pakistan aser parnoki kiralongra ajungkettsüba amokmerena Modi-i, "Nuclear amshitsü, ta amokmerenbaji joko magizüktetsü. India nung kiralongraba atema tapet meyiptsütsü, aser mangyangbaji onoki melungba ama inyaksü," ta metetdaksü.

Operation Sindoor dak sendakba nung pai, "Kiralongra tamajungtibaji Pahalgam amakba tatalokba liasü; iba ya ni asoshia tejashitsüka liasü. Kiralongrartem auyi küma samatsütsü atema onoki sepaitem nem tashi ajak agütsü. Asen aianutem tenütsü nungi sindoor agentsüba taaji tangbo tsükchirtemi metetogo. Operation Sindoor ya nüngja dangbo masü," ta ashi.

"Asen sepaitemi Pakistan nung drones khazüka yokba alima nung nüburtem ajaki nguogo. India-i Pakistan tiyongtsü amak aser asenok indang missiles-i parnok indang airbases raksatsü," ta pai ashi.

India aser Pakistan na tsünga ceasefire telemtetba agiba dak sendakba nung Ato kilonseri, teraksatsüba jenti ajangshiba sülen Pakistan-i alima dang teyari meshiba agi dang India-i Operation Sindoor anen, ajisüaka India-i Pakistan

nung inyaksangshi ajak mita dang alitsü, ta metetdaksü.

Paisa, "Operation Sindoor ya kiralongra anema asenok inyakyim ka asütsü. India nung kiralongra atalokra asenoki meyiper amaktsü. Kiralongra adokba tera ajak bushia amaktsü. Nuclear amshitsü ta amokmerenbaji India-i magizükatetsü. Kiralongra pusemba sorkar aser kiralongrar telok naji onoki mebandangtsü," ta metetdaksü.

"Asen army, air force, navy, BSF sepaitem aser paramilitary sepaitem maneni yakyaka lir. Asür kiralongrartem nem Pakistan army tongti ketdangsertemi tetushi agütsüba asenoki nguogo. Sensotem kümzüksü atema onoki inyaker. Tongbang raraba shia asenoki Pakistan tamakok ngudaktsüogo," ta pai metetdaksü.

"Tang putu ya raratsü putu ka masü aser kiralongratsü putu-a masü. Kiralongra ya khenyongi magizüktetsüla. Kenü anogo parnoki yariba kiralongrartemi parnok samatsütsü. Parnoki kiralongra infrastructure samatsütsüla. Kiralongra o ken o jembiba aser kiralongra o shishilembaba naji kodanga külemi moutettsü. Tzü aser azü na külemi ayimtsü makok," ta paisa metetdaksü.

Congress-i Parliament nung temeja senden ka ayongzüksü mepishir

New Delhi, May 12 (Agencies): Lok Sabha aser Rajya Sabha naprongla nung opposition lenirtemi shidi ajanga Ato kilonser, Narendra Modi dang kiralongrartemi Pahalgam amakba, India sepaitemi Operation Sindoor agiba aser arrtsülen khatepba dak sendakba onüktem nung o lemteptsü atema Parliament nung temeja senden ka ayongzüksü mepishiogo.

Amongnü Congress general secretary, Jairam Ramesh-i X ajanga item shidiji metetdaksü.

April 22 nü kiralongrartemi Pahalgam amakba sülen India sepaitemi Operation Sindoor kübok Pakistan nung kiralongrartem camp aika amak. Tesüsa India aser Pakistan nati ceasefire

sangdongba sülen Congress-i Parliament nung item onüktem nung o lemteptsü takhangba agütsü.

Lok Sabha nung opposition lenir Rahul Gandhi-i shidi nungji yamai zülua lir, "Opposition-i tangsa Parliament temeja senden ka ayongzüksü akhangba ni lephsia metetdaksü. Kiralongrartemi Pahalgam amakba, Operation Sindoor agiba aser US Tir Donald Trump-i mezünga ceasefire sangdongba onüktem nung India nüburtem aser nüburtemi shimtetba lenirtemi o lemteptsüji kanga tongtibang. Iba ya taruttsü nung tayongzükbä balala atema asenok ajak longjemer telemtetba agitsü atema maongka tajung asütsü. Nai

item temepishiba ya süoki ia agitsü aser tekeraba nung inyaksü ta ni imlar."

Ano Rajya Saba nung Opposition lenir, Mallikarjun Kharge-ia shidi ajanga Ato kilonser dang, "Tawa tatalokbatem nung ajemdaker Lok Sabha nung Opposition leniri nü dang opposition party temi Pahalgam amakba, Operation Sindoor aser Washington DC nungi tama ceasefire sangdong agütsüba, iba sülen ang India aser Pakistan sorkartemi sangdong agütsüba atema jembitsü asoshi Parliament nung temeja senden ka ayongzüksü mepishiogo. Rajya Sabha nung Opposition lenir ka ama nia iba temepishibaji pusema iba shidi zülur. Nai agizüksü imlar," ta metetdakja lir.

MENUNGRA BILEMTETER



ASUR CHAYUPANGI (LONGMISA)
05.08.1933 to 13.05.2024

Temeim Oba, Nai onok toktsür or kum ka abensa -a na onok den meliaka, nu temeim, nü tamang, aser nü sarasadem ola onok mulungjang nung titi bilemtetdaksü.

Temeim Kinungtsü, Chirnurtem, Anükapang aser Semchirseemnurtem.

Kiralongrartem asüpila sentong nung Pakistan nung lenirtem aika aden

New Delhi, May 12 (Agencies): Anogo ishika tejaklen India sepaitemi 'Operation Sindoor' mapang nung tepsetba LeT kiralongrartem asüpila sentong nung adener Pakistan nung lenirtem tenünga India-i sangdongogo.

Muridke nung kasetba kiralongrartem asüpila sentongji LeT Commander, Abdul Rauf leniba nung agi, aser iba sentong nungji Pakistan army nung tongti ketdangsertem aser Punjab Inspector General of Police aden. Iba sentong nungji Lt Gen Fayyaz Hussain, Major General Rao Imran, Brigadier Mohd Furqan (Administration), Usman Anwar Pakistan Punjab Legislator aser Malik Sohaib Ahmed nung aden.

Operation Sindoor kübok India nung sepaitemi Pakistan occupied Kashmir kübok Sawal Nala, Syedna Bilal, Gulpur, Barnala aser Abbas amak, aser Pakistan kübok Bhawalpur, Muridke, Sarjal aser Mehmoona Joya nung kiralongrartem camp amak.

India defence ministry-i Pakistan occupied Kashmir aser Pakistan nung

kiralongrartem installations 21 jangjaogo aser itemji Sawal Nala, Syed na Bilal, Maskar-e-Aqsa, Chelabandi, Abdullah bin Masood, Dulai, Garhi Habibullah, Batrasi, Balakot, Oghi, Boi, Sensa, Gulpur, Kotli, Barali, Dungi, Barnala, Mehmoona Joya, Sarjal, Mudrike aser Bahawalpur lir.

May 7 nü tepsetba kiralongrar tetsütitem rongnung Khalid Abu Akasha densema liasü. Tamalen pa Jammu & Kashmir nunga liasü. Pa Pakistan kübok Peshawar nung amenoker inyaka aruba sülen tawa Muridke nung aliba LeT headquarters-i oa lia Operation Sindoor kübok tepsetogo. Pa ya LeT Central Committee nunga züngsem ka liasü.

Ano Operation Sindoor kübok tepsetba kiralongrar tetsütitem rongnung Mohammad Hassan Khan densema liasü. Pa ya kiralongrar telok JeM nung Operational Commander, Mufti Asghar Khan'er jabaso lir.

2019 küm Jammu & Kashmir kübok Pulwama amakba nunga pai shilem agia liasü.

Uttar Pradesh CM Yogi-i Gorakhpur nung project ana semzüksü

Gorakhpur, May 12 (Agencies): Hombarnü Uttar Pradesh Chief Minister, Yogi Adityanath-i Gorakhpur nung alirtem atema tongtibang project ana tenzüksüogo.

Pai Urban Facilitation Centre (Nagariya Seva Kendra) semzüksüba den külemi teintet sensotem anepaluba 'senior citizen day care centre' ka semzüksü.

Iba sentong nung jembidang Yogi-i, "Nagariya Seva Kendra atema ni tenüngsang agütsü.

Uttar Pradesh sorkarisa teintet sensotem anüngdang amongtsü atema senior citizen day care centre ka semzüksü. Iba centre nung canteen ka, yoga, osangkakettem aser kaketnang nungi yimsü dak sendakba kakettem angutsü aser teintet sensotem tajungtiba nung anepalutsü," ta metetdaksü.

Paisa, "Gorakhpur ya terenlok lenman nung jajadar. Nüburtem atangji tajangzükbä balala ang nung ang terenlok tetezü aketer," ta metetdaksü.



May 12, 2025 nü Jammu nung BSF sepaitemi BSF constable Deepak Chingakhm tasümgang apur aoba noksa nung angur. Jammu arrtsülen Pakistan sepaitem den khatepdang Deepak asü.



TIR YIMYIM YIMOBILEM (EDITORIAL)

DIMAPUR TUESDAY, MAY (MONUPII) 13, 2025

Onsara imlaba takoksa !

Tangar lima aser tangar kintem amato asen lima nunga yimten lir, anungji yimsüsürtema lir; lokti tentettema lir, anungji lokti lenirtem lir; ano item dakji alaka asenoka Tsüngremi meimba nübortem asünungji asenok longjemer tenzükba arogo lir aser yangjia Tsüngrem tenzükertem lir. Item ajakji parnoki parnoksa yimsüsür aser lenirtem akümba masü saka asenoki asenok len anidaksütsü shimtetba lenir, yimsüsür aser Tsüngrem tenzükertem lir, anungji asenoki parnok dak nungi asen nüngdak inyaksütsü imlatsübaji tim dang lir aser nübortemi lenirtem dak nungi tajung inyaksütsü imla tashi lenirtem dak nübortemi temulung lemteta dang lir aser akhümtsübur ta yimya mapa jagi sayur. Aji oda, nübortemi parnok dak imlaba nung jagi yimsüsür, lenir aser Tsüngrem tenzükertem tashi angur. Ajisüaka, koba anogo nung nübortemi lenirtem dakji teimla samadir, lenirji lenir masü akümtsü, kechiyong teimla malinungji nübortemi mebushitsü aser nübortemi mebushira shirnok madak yimsü asüsü aser shirnok madak lenir asüsü ? Ibaji tanü asen lima nung yimsüsür, lokti lenir aser Tsüngrem tenzükertemi angatet nungbo koda jungla ta anogo shia bilemer. Aji oda, yimten nung süshia, lokti nung süshia aser arogo nung süshia nübortemi lenirtem bushia marura lenirbo lenir saka tanidaker mali kija dang akümtsü aser kija dang kümer pei kibong asoshi dang inyaka yimsü asütsübaji aser lokti aser arogo tenzüktsübaji kecha tetezü maka aser jangramatem kümadoktsü. Ajisüaka, ano külen nübortemia mapa ajak yimsüsür, lenir aser Tsüngrem tenzükertem dak dang imlar, peisasa rajema inyaksübo kecha mali ama bilemra, ibaji peisasa pi lar akümer asüsü. Tanü asen lima nung asen yimsüsürtem, lokti lenirtem aser Tsüngrem tenzükertem den asenok nübortem tiaji medemdangra, tekalen alirtemi kecha meinyaksür aser teküpboklen alirtemia onrasa imlar ta asüba tensa nung asenok ajak tamakoker kümer kati ka aitsütepba telokang ka kümogo. Aji oda, asenok nübortemibo temeyonga meküraktsü saka asen kima aoktsü tashia government dak imlar. Kasaji asenoki inyakbo kecha mashi aser memetet saka government-i asenok nem mapa agütsütsü imlar. Aji oda, asenok taginüba aser nükjidadong ajak agi mapa meinyak aser mapai mao ita asen chia linür. Ajisüaka, asenoki asenok asoshi nüngdak ajak government-i inyaksütsü imla tashi asenok maintsü aser tain kümaka jajaa moutettsü. Asenoki meteta inyaksüba kaji government-i nübortem yanglu masü saka nübortemiang government yanglu, anungji kiburji government masü nübortem lir. Ibayongji, government nung alirtemiang nübortemi parnok nem shisatsü tajung agüja nungittsü imlar. Aji oda, government-i inyaksüba aser yanglutsüba lenmang, kiojen aser kechisarina ajakji nübortemi nübortem meyonga ta angateta anepalutsü government nung alirtemi nübortem dang nungi imlar. Aji oda, imlaba dang masü saka government nung alirtemi parnoki langka nung danga aibelena inyakra nübortemi parnokji aputsü aser aitsütsü nükentsüba bilemer, kechiyong government nung alirtemji nübortemi ayuba kilirtem lir. Ajisüaka, tanü asenok nübortemi asenokang kilir aser government nung alirtemjiang kibur amai bilemer. Iba kolokji dener asenoki asen taküm aser kibong nüngdak ajak government-i agütsütsü imlaa government nem mesüdaktsür. Ibayongji government nung alirtemi asenok nübortem ya farm nung aliba aktem amai züngshir. Aji oda, nübortem nembo anogo nung anaben chi agütsüra teperi aser kodang nüngdakdir tayoka ayoktsü aser talia alitsü. Tanü asenok nübortem iba jenjang nungji lir. Aji oda, anogo shia sangwa arudang chi agütsütsü imlar aser anogo piyong mejanga kazür ano nikongtsütsüa chi agütsütsü imlar. Ajisüaka, tanübo government-ia angatibo asenok aktem nem anogo nung chi anaben mechiyongdaktsütet kümogo, iba jagi asenoki meteta asenok kongrar aser anogo piyong chi meshia asar. Ibaji kodang asenoki asenoksasa asenok ya ak masü nisunga ta rajemtetdir, chi meshia asabaji akseta bilemtsü aser joko tangar dang meimlai asenoksasa asenoki inyakba agi taküm topur junga kibur kümtetkümteta ali tenzüktsü. Iba ama anogo ka ajurutsübajiang imlaseta mapa angazükdi aser inyakdi.

OLEMSABANG

KIBONG LIRUMEDEM TAMANG

~ Mrs. Amenla APW, Akhoya Baptist Arogo

'Lirumedem' tetezü "Kasasa" mesüra "Medem Medema" ta ashitsü akok. Tajitettsü/Tashishitsü mali.

'Tamang' tetezü Yisu shiba asen menen asoshi asü aser shia aru paji asen taküm nung kümtetdakba aser kibur ta agizüka amangba'. Ano lamang' nungji asen tebilemba aser asen taküm ajunga Yisu Khrista nem bendanga agütsüba, anaprongla dena lir. Anungji Kibong lirumedem tamang' tetezü, Tetsü, Tebu aser Chirnur ajaki Yisuji, K? k?mtetdakba aser kibur ta agizüka amangba den inyaksashi libaliro ajak nung kibong rangbeni Tsüngrem pelatsüsa litetba. Kibong nung alir ajaki lai bushiba, sarasademba, tangar yariba, Tsüngrem dang tashi angaba, sentepi aoba, kati ka taoba ta meimba, kati ka dang akhümtsübuba ajakji dena lir ta angateta yudi.

Yakob 2:22& 26, "Tamangji pa mapa yariba liasü aser mapa agi tamang abensadaktsür ta nai angur. V26 Kechiyong kechi koda tanela medeni temang tasü, aji oda mapa medenibo tamangjia tasü lir".

I. LIRUMEDEM TAMANG KIBONG NOKSA KAR REPRANGDANGDI

1. Elkana-r Kibong (1 Samuel 1)

Elkana kinungtsü Hana tapongla liasü, saka Elkanai kanga meim aser kodanga la metoktsü. Hanai Tsüngrem dang mepeshiba langzüa Samuel moatsü, Jabasoi tsüraburi ashiba angaba den Tsüngrem sentong angateta Tsüngrem tenzük. 1 Samuel 1:11 Lai tatemzükba ka atemzuka ashi, "Oh Temeranger telok Kibuba, nai atangji ne kilitsür ala-ashi reprangra, aser ne kilitsür nem jabaso ka agütsüra idangji pa taküm arishi anogo ajak Kibuba nem ni agütsütsü aser pa kolak nung kusünok kodanga mataloktsü"

2. Shunamtsürlar Kibong (2 Chubatem 4:8-17)

La ya kanga dang tangatetba tajung akaba awashi metetba aser Tsüngrem meimba tetsür ka liasü. Kenü lai kinungbo dang mepishia Elisha asoshi lar kidang taktang ka yanglutsü asüngdang aser pa asoshi tanendak taktang ka yanglutsü. Kinungtsüi Tsüngrem tenzüker asoshi mapa tajung inyaksü apitet nung, la kinungbui tashi anga iba mapa inyaksü nung Tsüngrem peladaksü anungji par kibong nem Tsüngremi jabaso ka moatsü. Kinungtsü kinungpu lirumedem tamang ajanga kibong nung küm aika monguteti aliba temoatsü anguba angur.

3. Preskila kibong (2 Timoti 4:19)

Preskila kinungbu ya Akula aser tena ya süki yanglur kibong ka liasü. Kinungpu Akula asoshi pa kinungtsüji kangsa teyarir tajungtiba liasü. Laishiba nung tena tenüng ya 6 ben tashi külemi amshiba angutsü. Kinungpu aser kinungtsü tamang lirumedemba ajanga mapa ajak takok ngua inyakba kibong par kibong ya liasü.

4. Filip-er Kibong (T. Mapa 21:8-9)

Par kibong ya kanga dang tenükshitsüka ka lir. Filipi Tsüngrem mapa inyakba dang masü saka pai sensaker atema teyari mapa inyakba aser taneptsü mapa inyakba nung jalatemi tebu yari. Jalatemji reprangdangra kanga dang tasüngtet aiürtem liasü ta Tsüngrem 0-i kuli agütsür aser par pezü pronglai shin o jembi. Iba ya kinong nung tamang lirumedemba noksa lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Gutenberg nem tetushi agüja Laishiba tapak tulutiba saya



May 12, 2025: Printing press yanglutetsang aser Gutenberg Bible adoksang, Johannes Gutenberg sor küm 625 ajungba nüngtem nung pa nem tetushi agüja Germany nung aliba Mainz Cathedral nung Laishiba tapak tulutiba sayaogo.

Süklep (feet) 16.4 x 23.6 Laishiba tapak nungji osangtajung Yohan kaket mezüngbuba tapak nung aliba Lai tekongtem lir. Iba Lai tekongtemji Shuckburgh Bible nungi meyipzükba lir.

Tawa osangbenertem senden ka nung Mainz nung Mayor Nino Haase aser Mainz Cathedral nung Dean, Rev. Henning Priesel nati Laishiba page ji semzükja liasü.

Cathedral nung dean, Priesel-i, "Gutenberg Laishiba tapak tuluji Mainz Cathedral nung choir amenba tsütsülen shidak yuteter. Johannes Gutenberg ya Mainz yimti nungi sotetba jabaso ka lir, anungji Laishiba tapak tulutibaji iba

cathedral nung ayutsü tim," ta ashi.

All Saints' Chapel, Mainz Cathedral nung reading corner ka lir, aser iba nungji tanur-tain ajaki züngtettsüsa Laishiba tapu aika yuja lir. Iba Cathedral semdangertem dang iba tesem nungji aliba 'guest book' nung parnoki sapuba Lai tekongtem zülua yujang ta mepishir.

Mainz yimti nung nung Mayor, Nino Haase-i, "Alima nung Laishiba tapak tulutiba reprangtsü ya jangratemtsüka lir. Mainz Cathedral nung Laishiba tapak tulutiba sayaba ajanga yimti nung alirtemi ano taliba nükshitsü. Atangji asen yimti nung alirtemi tasen purapiteta yanglusang Johannes Gutenberg sor küm 625 ajungba küm nung pa nem tetushi agütsür," ta metetdaksü.

Laishiba tapak tulutiba ya April 26, 2025 nü akhidang amshiba letterpress technique amshia menünga liasü. Markus Kohz leniba nung International

Gutenberg Society nungi team kati Lai tapak tulutibaji menüng.

Parnoki computer-milled printer ka nung rong inok aser ibaji gari kati aiben menünga Laishiba tapak tulutibaji menüngteta liasü.

Bible page exhibition ya Mainz Cathedral nung staff temi ayongzükba lir. Parnokisa 'The Whole World on Parchment: The Choir Books from the Mainz Carmelite Monastery' ta ser exhibition ka tenzükogo. Iba exhibition ya Mainz Cathedral aser Diocesan Museum nung sayar, aser June 15 tashi iba dak sendakba sentong balala agitsü.

Gutenberg sor küm 625 ajungba nüngtem nung kenten sentong-a ka ayongzüktsü. Bible page exhibition ya August 24 tashi agitsü. Tatembangbuba sentong nung cathedral choirs, Mainz Philharmonic State Orchestra aser Johannes Gutenberg University Mainz nungi Collegium Musicum-i shilem agitsü.

Tarutsü nung Tenla kidang menden tazüng aika alitsü: Thomas Menamparam

May 12, 2025: Taoba mapang tongti putir kati India nung Arogo lenirtem dang Arogo nung ola balala angadangtsü aser lanurtem nüngdak reprangteta inyaksü ajungshi.

Paisa, India nung Catholic Khristanem tamang jenjang tamajungba kümdar, ta metetdaksü.

Guwahati nung taoba mapang Archbishop, Thomas Menamparampil-i May 10 nü Arogo nung lenirtem dang, India nunga European Church nung atalokba ama ataloktsü, ta tekümdangtsü metetdaksü.

Europe nung aliba Arogotem aika nung putirtem mali, sabang tazüng aser Tenla kidang menden tazüng, aser India nung aliba Arogotem nunga yamaji ataloktsü menoa mali, ta pai metetdaksü.

"Arogo telung nung mangatettep aser obang mapu balala mapang shidak nung mebentetra India nung aliba Arogoia tarutsü nung kasa tiaji ajurutsü," ta Menamparampil-i ashi.

May 10, 2025 nü Kerala

state kübok Diocese of Palai nungi alima tesem balala nung missionary inyaker putirtem, brothers aser nun 4,800 den jembidang pai iba o ya metetdakja liasü.

Iba sentong ya May 10 nü Pravithanam nung aliba St Augustine Arogo Tenla kima agia liasü.

Kasa sentong nung jembidang iba diocese nung vicar general, Joseph Maleparampil-i, "Iba küm ya asen Arogo küm 70 ajungba jubilee küm lir, ibayongji asenoki alima tesem balala nung tenzükba asen missionary tem nem akhüm agütsür," ta ashi.

Iba sentong nungji bishops 17 densema liasü.

May 12 nü osangbenertem den jembidang Joseph-i, "Iba sentong ya onok missionary temi inyakba sayatsü, aser ibaji ajanga lanurtem ajungmesotsü nükjidadong nung agi," ta ashi.

Menamparampil-i, India nung Arogo yangertetba ya Europe nung aliba linüktem nungi missionary meyirjang aika asentzü aser azü ajanga lir, ta

ashi.

Missionary temi sensakertem aser nüngdakbapurtem nem shisaliok aser healthcare agütsüba densema ministry balala inyakba ajanga asen linük nung Arogo yangertet, ta pai ashi.

"Tia maka, tanübo item linüktem (Europe nung aliba linüktem) nungji tamangertem tamang jenjang tamajungba akümer. Indian Arogo nunga kasaji atalokdar, talisa lanurtem rongnung ataloker," ta pai metetdaksü.

Menamparampil-i, Kerala nunga lanurtem tamang jenjang tamajungba kümdar; literacy rate ajungba den alima yimya balala kulitem ajanga tamang jenjangbo tamajungba dang akümer, ta pai ashi.

Arogo telung nung mangatettep balala tangatetba tajung nung mebentetra Arogo tenyaba wadang nung tetsükdaksü ajurutsü, ta pai ashi.

Nütsüng million 33 aliba Kerala state nung nütsüng shilem 18 bo Khristanem lir.

ANOGO ABEN TSÜNGREM DEN

Tamang Maten

Saka atsüayonga chira pa aitsür, kechiaser pai tamang agi machir, aser kechisa tamang agi masü aji temenen. Rome 14:23

Ibri shiti züluri tamang meteni Tsüngrem peladaksütsü makok ta zülu (Ibri 11:6). Kodangsa Tsüngremi langka jungkai adokdaksüdir, asenoki Pa dak amangtsü aser asenok yamaji alitsü Pai yimlar. Iba tetezü kechi? Iba tetezü asen nüngdak ajak Pai agütsütsü ta asenoki amanger kechiaser Pai agütsütsü nangzük (Fil. 4:19). Iba tetezü timtem nungi Tsüngremi tajung adoktsütsü ta asenoki amanger (Rom 8:28). Iba tetezü koda masüba tia ajak asenoki koktetter kechiaser asen nüngdak ajak Pa dangi bener arung ta Tsüngremi nangzük (Fil. 4:6). Iba tetezü taküm nung kechi atalokdir atalokang asenok kija masü Tsüngremi asenok kodanga mesentoker anungji shisa mebulur (Tazüng. 31:6). Iba tetezü asenoki kodanga Tsüngrem temeim nung marendaker (Yr. 31:3).

Khen khen asenoki asen tamang makaba temeten bushir. Tsüngremi kechi nangzük asenoki metet saka mapa nung, asen taküm nung balaka inyaksü ta asenoki arendaker. Mepetmesü mapang nung asenoki shisa dang bulur aser iba timtem mapa nungi Tsüngremi kecha tajung matokdaksütsü ama dang bilemer. Asenoki asen nüngdak nung yaritsü asoshi asen meketa alir ajak nungi teyari asüngdanger aser asenoki ratetta ashir: "Tsüngremi kü nüngdak agütsütsü ta ni metet, saka ni akokba tashi ni meranga inyaksüla ta ni bilemer." Tsüngremi iba dangji tamang makaba ta ajar. Tamang makabaji temenen. "Tamang meteni Tsüngrem peladaksütsü tamakoktsü" (Ibri 11:6).

ForrestFrank-i 'Child of God II' kensep saya

May 12, 2025: Osangtajung Tsüngremi nü nem mapa ka kentener, Forrest Frank-i alakteta agütsü aser iba "Child of God II" kensep atemaji onok pelar. Lanurtem sayaogo, aser iba ya pai ayimjemtsü atema Tsüngremi adokba kensep 8buba asütsü. na shimba atema onok pelar," ta ashir.

"Child of God II" jakdang pai "Child of God" kensep Frank tebouisa par semchir sayaa liasü aser iba kensepji Frank atema yamai hopta 18 tashi Billboard Top sarasademtsür, "Oba, Forrest-i Tenyartem Mapa kaket nung alibatem ajangshitsü atema ni sarasadema arur aser Nai Nü tanela nüburtem madak meküplokjang. Mezüngbuba nung, parnoki Yisu ajangshitsü aser kümzüktsü Nai yariang. Oba, Tenyartem Mapa nung shia aliba ama tesüngmangtsü mapatem ataloktsü aser taneptsüba sayatenya ataloktsü atema ni sarasademer. Forrest meshitetjang ta onoki Nü dang sarasademer."

Grammy nominations dak alia Billboard music awards asem atema-a pa nominate asü. Pai GMA Dove Awards nung New Artist of the Year award aser Pop/Contemporary Recorded Song of the Year award angu.

Taküm K-LOVE Fan Awards nung pa Artist of the Year aser Male Artist of the Year atema nominate süa lir.

"Child of God" kensep nung mezüng ken "Encore" nung mezüngbuba minute anabo Frank aser tebou na sensaksemba lir. Tebou pa dang, 'lanurtem den Khrista osangtajung lemsateptsü atema Tsüngremi na shimba atema ni kanga pelar' ta ashir.

Frank teboui pa dang, "Atangji ni kanga pelar, aser ni ibaji rasa-a meshiteter.

ForrestFrank-i alakteta agütsü aser iba atemaji onok pelar. Lanurtem atema Tsüngremi na shimba atema onok pelar," ta ashir.

Frank tebouisa par semchir Frank atema yamai sarasademtsür, "Oba, Forrest-i Tenyartem Mapa kaket nung alibatem ajangshitsü atema ni sarasadema arur aser Nai Nü tanela nüburtem madak meküplokjang. Mezüngbuba nung, parnoki Yisu ajangshitsü aser kümzüktsü Nai yariang. Oba, Tenyartem Mapa nung shia aliba ama tesüngmangtsü mapatem ataloktsü aser taneptsüba sayatenya ataloktsü atema ni sarasademer. Forrest meshitetjang ta onoki Nü dang sarasademer."

"Child of God II" kensep nungji ken tasen 20 lir, aser item rongnung pa kijai atenba kentemji- "Your Way's Better," "Drop!," "Nothing Else," "Celebration," "No L's," aser "Amen" kentem lir. Iba dak alia pai Thomas Rhett, Nathan Davis Jr. aser Limoblaze nunger den külemi atenba ken kar densema lir.

AO OSHI ANGAZÜKDAK:

TANÜ ANGAZÜKTSÜBA OJANG



Tempu

(n) ayong nung tzü taroklen masü, teladak (shallow water)

* Ayong ajanga aodang tempu bushia ajangtsüla.

Temsa

(v) tatsütsü küma lepsa (cut bamboo type material into short size)

* Tambusangi nok techira agi süng kanga melaa temsa.

OLONG PAITEP # 7149

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- Nisung jenti - (5)
- Tsük rudenba - (5)
- Temzüng tesashi - (5)
- S _ _ _ i - (3)
- Nisung telemasa - (3)
- Anogoshi - (4)
- Ajanga aor - (4)
- Tsük rizüngdak - (3)
- Tebang nungi adokba - (3)
- Süngdong tatembangtiba - (5)
- Meputep - (5)

LANGTSÜNGLEN

- Tenük telong - (9)
- Committee dang ajar - (5)
- Yagi ki okdoker - (7)
- Yim lenmang - (5)
- Temoatsü keter meyipa aruba - (9)
- Kanga junga menemba - (7)
- Majinü - (5)
- Tzüma nung senzüba - (5)

OLONG PAITEP # 7148 TELANGZÜBA

TIPIEN :

- Bangsemo, 6. Tiptem, 8. Jen,
9. Talila, 11. Aren, 12. Tzübo, 14. Alia,
16. Angati, 17. Odi, 18. Azü,
19. Sünglang.

LANGTSÜNGLEN :

- Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

NAI-A YA METETTER MA



Foshan Sunhohi Smart Home Technology Co. ta ser window & door company kati domino toppling experts telok ka den külemi Guinness World Record ka yangluogo.

Company-i parnok 'Ultimate Space' facility nung Wang Lei'er Domino World telok jaok aser wind-proof windows enoker playing cards 51,725 tashi dominoes ama amentepa sülen chirepdaktsü. Domino World-i tang tashi nung Guinness World Records 7 tashi yangluteta lir.

Domino World teloki Foshan Sunhohi indang logo, mascot aser tanga motifs mesüka yanglu.

NIA-i 'village volunteer' apuba anema lungkak ait



Imphal, May 12, 2025 (Agencies): National Investigation Agency (NIA)-i Bishnupur district nung 'Village Volunteer' ka pur aoba anema Meira Paibi temi lungkak ait.

Kumbi assembly constituency kübok Saiton Heiyaikon nung tetsürtemi rally ayongzüka agi.

Parnoki "We condemn the arrest of village volunteers", "Release the village volunteer

immediately", "Withdraw all charges against the village volunteer", aser "Meiraba should be released immediately without any condition" tezülubatem amer lungkak ait.

"Honibarnü NIA-i Saiton Heiyaikon nung alir Nongthombam Meiraba (25) apu. Pa ya Nongthombam Mani'er jabaso lir" ta Heiyaikon Meira Paibi secretary Aheibam Babita-i ashi.

N Meiraba ya 'village volunteer' ka ama inyaka arur aser ozüing alema inyaksangshir dang nungi nübortem kümzüka ayutsü mapa inyaker.

NIA-i arrest memo melii pa apu ta Meira Paibi temi aitsür.

Meiraba ya tai maketba nisung ka lir aser pai Kuki narco-terrorists dang nungi par yimtsüing kümzüka ayutsü mapa inyaka arur ta Meira Paibi secretary Babita-isa ashi.

VPP-i all-party railway committee tentetba ashishir

Guwahati, May 12, 2025 (Agencies): Meghalaya sorkari railway connectivity atema all-party committee ka tentetba

nung madentsü ta Voice of the People Party (VPP), Meghalaya-i metetdaktüsügo.

"Kechiba railway connectivity atema all-party committee ka tenteter? Sorkari public tebilemba meteta dang lir aser onoki Assembly nung onok tangatetba lemsatepogo" ta

VPP president Ardent Basaiawmoit-i ashi.

Political party temi railway tebilemtsü mekpektetra state tsükdaktsü ta sorkari ashiba sülen Basaiawmoit-i iba osang metetdaktüsü.

VPP aser Congress party-i all-party committee nung madentsü metetdaktüsügo. Meghalaya kübok Khasi-Jaintia tesem tashi railway lines tonga aotsü atema state sorkari

meranger.

Sorkari bendangertem aruba mita reprangtsü system tajung ka tenzüka sülen ang railway development atema sentongtem atongtsüla ta Basaiawmoit-isa ashi.

"Sorkari nüngdaka ta amangra railway project inyaka oang, saka onok tebilemba ashiba sülen kechiba committee ka tenteter?" ta paisa asüngdang.

Arunachal Police-i Dibang Valley nung poppy alu raksatsü



Dibrugarh, May 12, 2025 (Agencies): Operation Dawn 2.0 kübok Arunachal Pradesh nung Dibang Valley Police den district administration yaritepa poppy alu raksatsügo.

Osang tejangja ka angazükba sülen May 10, 2025 nü Sub-Inspector (SG) Chote Lal Sahani aser Executive Magistrate Dr. Kajum Mara nati anir külem telok kati Angrim Valley village anasa mita ao.

Anini-Dumbuen Road aser Dri River tsüingda tesem mita aodang parnoki 110 square meters nung poppy tema aliba angu aser raksaa endoktsü.

K e t d a n g s ü r t e m i

photography aser videography ajanga mapa inyakba ajak kuli bendena ayu.

Police-isa Anini Police Station nung iba asoshi ken o ka benokogo.

Police department-i Sub-Inspector Lokmey Boluk nem bushisüngdangtsü mapa nungloksügo aser pai iba alu ayimertem maitsü jangjatsü bushitepa arudar.

Ketdangsürtemisa raw poppy material seret 1 shi ngutetogo aser ibaji kuli ama agütsügo.

Dibang Valley nung taoba mapang Narcotic Drugs and Psychotropic Substances

(NDPS) Act kübok mapa aika inyakogo aser itemji teimba drug possession mesüra illegal sale atema liasü.

"Police aser administrative teams-i mapang shitak nung mapa inyakba atema tenüngsang agütsür. Department-i narcotics samatsütsü nükjidong yur inyaker aser maneni anti-drug laws akangakanga benshitsü" ta Superintendent of Police Manish Shaurya-i ashi.

Dibang Valley Police-ia tajungba nüka mittsü aser drug maparen nungi jenbua lidaktsütsü atema bushisüngdangtsü ta metetdaktüsügo.

USo China tayang kepzüktepba tariff shilem 115 ajemtsü

Geneva, Monupii/May 12 (Agencies): United States aser China nati tariffs tasen meshiba anogo 90 atema soita atatsü mulungtepogo aser tang aliba tariff shilem 115 ajemtsü, ta US Treasury Secretary Scott Bessent-i Hombarnü ashi.

Linük ana tsüngta trade war tajemba akumtsü asoshi US aser China tangatettep kati aruogo aser maneni jembishinü akatsü atema lenmang lapoker, ta pai ashi.

"Anogo 90 anena atatsü aser tariff levels ajemtsü asoshi China den tezüngzüktep ka yangluogo," ta pai ashi.

May 14 tashinung United States-i ajak senteper China nunger bener aruba oset nung tariffs shilem 145 ajema shilem 30 tashi alutsü, aser yangji fentanyl dak sendakba dena lir aser China-i US oset tem nung tariff shilem 125 meshia aliba ajema shilem 10 tashi alutsü, ta linük ana ketdangsüri Geneva

nungi sangdong ka külemi agütsü. "Fentanyl atema tejakleni mera aotsü asoshi kanga junga sensaksem kaogo. Katia mepilaner ta tangatetba nung lir," ta Bessent-i ashi.

Sangdong ajangasa rongsenketzüng aser shishilempaba tesendaktep atema maneni jembitsü asoshi inyakyim ka amenoktsü, ta sangdong ajanga ashi.

Iba sangdong ya tariff war ajemtsü asoshi tejakleni aoba nung mera ka alitsü, koba ajanga linük ana tsüngta shishilempaba kanga ajema lir.

US aser China linük anaprongi taoba mapanga jembishinüba nung terenlok kanga lir ta ashia liasü, koba ajanga markets asendenshidaktsü aser Trump ajanga April 2 nü tariff sangdongba agi takoksa ajurur aliba Chines stocks tanaben shia aruba nung yari.

US Trade Representative

Jamieson Greer-i ashiba agi, linük-i China den shishilempaba tsütsü tajungtiba nung tesendaktep alitsü meranger.

White House-i mezüngbo iba agreement ya "trade deal" ka lir ta Honibarnü sangdong ka nung shia liasü, ajisüaka linük anaprong asoshi agizüktettsüsa terenemba mesüra kobika nung takok angutsüar mejangja. Taoba mapang China-i taküb benokba US tariffs ajunga agentsü khanga liasü, koba US-i trade deficit ajemtsü mesüra samadaktsütsü nükjidong aliba den mapeter.

2018 nunga jembishinüba sülen US aser China nati mangatettep anena atatsü mulungtep, ajisüaka mapang tatsüka lir Washington-i iba tezüngzüktep nungi ainshia ita 18 tashi tariff tali meshia jembishibnü tenzük aser January 2020 nung "Phase One" deal zülutepa liasü.

Minute 30 tsüngta alima tesem mashi maktettsü hypersonic missiles lir: China

Beijing, Monupii/May 12 (Agencies): Missile technology tsütsü alakteta terenlok lia China nunger scientists temi anünglak nungi hypersonic missiles khaloktsütsüsa yanglutetogo ta ashir, koba ajanga global defence dynamics melenshitsü. Iba osang ya India indang Operation Sindoor sülen angashir, kong BrahMos missile amshia Pakistani defence system nungpoka oa targets tem nung takok ngua maktet ta ashir.

Chinese academic journal Acta Aeronautica et Astronautica Sinica nung report ka ajanga ashiba agi, item missiles nungya re-entry glide vehicle (RGV) keta lir aser Mach 20 mesüra ghonda ka nung kilometres 13,000 tashi kera jajateter. Anungji China-i minute 30 tsüngta alima nung tesem mashi maktettsü ta sayur.

Hypersonic nok-nü ya traditional defence systems paidoktettsüsa yanglua lir aser tang amshiba radar technologies amshia putettsü tasak, saka infrared technology amshia puteter.

RGV indang design yagi item missiles indang direction kanga kera aser takzütsü mokoki melenshiteter aser item ya satellites aser ground-bases systems densema tesem balala nungi khaloktsüteter.

Alima nung tashi tulu aliba linüktemi hypersonic technology nung senotsü kanga indoker. United States aser Britain lungjemer hypersonic cruise missile demonstrator ka yanglutar, aser tang tashinung

200 ben dak tema tendangogo aser 2030 tashinung renemtsü imlar.

Iba technology tsütsü India ya kanga talangkabo atsüngzüka oa mali. 2020 küm Defence Research and Development Organisation (DRDO) ajanga Hypersonic Technology Demonstrator Vehicle (HSTDV) takok ngua tendanga liasü. Iba den ano India ya BrahMos-2 hypersonic missile yanglutsü inyaktar, koba China den sako alitsü asoshi tongti shilem agitsü.

S-400 aser Prithvi amala advanced air defence systems liaka India-i hypersonic missiles den tokteptsü asoshi tashi ulushitsü nüngdaker.

November 2024 nung India-i Odisha tzükumlen aliba APJ Abdul Kalam Island nungi long range hypersonic missile ka

takok ngua tendanga liasü.

Iba missile ya DRDO ajanga yanglu, kong payloads balala bener meta kilometres 1,500 dang tali aotsüsa yanglua lir.

Yimya agi hypersonic missiles yagi conventional explosives mesüra nuclear warheads bener "speed of sound" dang ponguben agi tekeraba (Mach 5 ya 1,220 km) per hour jajateter. Ajisüaka hypersonic missiles karbo Mach 15 dang tekeraba nung ayimtsü akoker.

Tang hypersonic missiles yangluba nung Russia aser China kanga agi jelia lir, aser US-ia iba amala nok-nü yangluba mapang lir. Ano France, Germany, Australia, Japan, Iran aser Israel densema linük kari hypersonic missile systems yanglutsü meranger.

Gaza nung inyakyim atsülangshitsü Israel bendanga agütsür lir

Tel Aviv, Monupii/May 12 (Agencies): Israeli-American sepai Edan Alexander mechiok tsüngda Israel-i ceasefire mesüra tepuoker melenteptsü atema Hamas den kecha nangzüktepba mali, saka Gaza nung inyakyim atsülangshitsü renemer, ta Ato Kilonseri ashi.

Ato Klinoser Benjamin Netanyahu office sangdong ka ajanga Hombarnü ashiba agi, "Gaza nung raratep tiayalong aser raratsü atema renemba mapang ceasefire atema maneni sensak asemtsü." Israel nunger lenir yagi ashiba agi, military-i nongshiba ajanga Hamas puri tepuokertem chiokogo.

"Ceasefire atema Israel-i, mesüra Palestine nunger chioktsü asoshi kecha nangzüka mali, saka Alexander kecha tetsükdaktsü makai odaktsütsü atema mulunga agizükogo, shiba Gaza nung pua aliba taküm alir United States nunger tatembangbuba lir, ta kasa sangdong ajanga metetdaktsü.

Hamas source kati Hombarnü AFP news agency dang ashiba agi, tepuoker chiokba mapang Israel-i Gaza nung inyaksangshi anena atatsü ta ken o jembitsürtemi Hamas pur dang shiogo.

Hamas-i Hombarnü ashiba agi, Alexander ya chioktsüba dang liasü. US tir den teka



Office of the

MONGSENYIMTI SENSO MUNGDANG

B.P.O MONGSENYIMTI P.O. CHUCHUYIMLANG

DIST: MOKOKCHUNG NAGALAND-798614

KHONANG NÜNGSANG YIMYIM

Nendak nendaka Tsüngrem akhümtsübua ajemalua litetba maong nung Mongsenyimti lisopur shirnoki taküm luyim wadang balala nung aser meranga azüngba nüngtem khonang balala ajangzükteta sensosanger ajak numadangtettsü khonang tulu bentsür aruogo, Mongsenyimti Sensosanger Inti tenüng nung Mongsenyimti Senso Mungdang Mendendi ajanga tetushi tenüngsang tulu agütsür;

1. **Wb. Meyinuksung Ozukum** (Wb. Lt. Yarentemso aser Lt. Wt.Sentizungla jabaso) ajanga Deputy Development Commissioner (Dept. Of Planning & Transformation) jenjang tongtet.

2. **Kr. Akumjungla Jamir** (Wb. Repanungsang Jamir aser Wt. Tolapokla jala), Asst. Professor (Philosophy) jenjang NPSC kübok tatitang nung ajangzüktet.

Tarutsü anogotem nung asen nübur songtetsongteta tenzüktettsu teyanglur Tsüngremi nenok sempet aser wadangtem molamoshia moaja anitsü sarasademtsür.

Sd/-

IMOTONG

President, MSM

Sd/-

S.NOKINLEMBA

Secretary , MSM

Russia-iUkraine amaktsüdrone100daktemayok

Kyiv, Monupii/May 12 (Agencies): Ukraine-i ashiba agi, Kyiv pusemertemi anogo 30 atema ceasefire benoktsü asoshi Moscow nem haihaura kadaktsütsü asoshi inyakba mapang Russia-i manger mesangwa tsüngda drone 100 dak tema yoka tesem balala makogo.

Ukraine indang air defence-i Russia-i yokba drone 108 nungi 55 bo raksatsüogo. Drone tem ya Deobar aonung 11 ako nungi tenzüka yoka liasü, ta Ukraine indang air force-i Hombarnü ashi.

Drone tem rongnung simulator drone 30 densema liasü, koba kecha daka mekongshi-i dang lentom nung sama liasü. Drone tem ya east, north, south aser central Ukraine kübok tesem balala nung khadanga liasü, ta air force-i ashi.

Southern Odesa tesem nung nisung ka yiru aser nisung aliba ki ka raksa liasü, ta military administration-i ashi. Donetsk tesem nunga railway infrastructure ka raksatsüogo aser train anishir ka yiruja liasü.

Ukraine national railway operator Ukrzaliznytsia-i ashiba agi, ceasefire atema benokba mezüngshir aser

tsükchrtemi maneni railway infrastructure tem amaker.

Honibarnü France, Germany, Poland, aser United Kingdom nungi lenirtemi Kyiv semdangba mapang parnoki, yimjung atema sensaksemtsü asoshi Hombarnü nungi tenzüka anogo 30 asoshi ceasefire benoktsü atema mulunga agizüktsü Russia ayongzüka liasü. Iba onük ya United States-ia pusemer ta parnoki ashi.

Russia tir Vladimir Putin-i Deobarnü, Ukraine den Istanbul nung May 15 nü indang indanga sensak asemtsü benokogo, ajisüaka pai Europe nunger lenirtemi benokba indangbo indang indang mejembi saka Russia nem takhangba balala agütsüba aitsüogo.

"Sensaksem mapang ceasefire benoktsü atema memulungteptsü akok," ta Putin-i ashi.

Ceasefire ka tama benoktsüla ta shia Ukraine tir Volodymyr Zelenskyy-i, pa Turkiye nung Putin den ajuruteptsü atema renema alitsü ta shiogo, saka Russia-i ceasefire atema benokba magizükra pai iba sensaksem nung shilem agitsü magitsü iba indang kecha mashi.

independent body ka nem bendanga agütsütsü atema sensaksem tenzükshitsü atema parnok renema lir.

Kasa mapang nung Alexander'er kinungertemi ashiba agi, iba telemtetba agiba ajanga tanungba tepuoker 59 chioktsü atema lenmang lapoktsütsü imlar. Tepuokertem ya 21 dang taküm alitsü imlar.

Tepuoker kinungertem aser Israel nung parnok pusemertemi tepuokertem chiokdaktsütsü atema tenangzüktepba ka yanglutsü sorkar nongshia arudar, ajisüaka cabinet nung lenirtem kari rara manentsü atema Netanyahu kanga nongshia arudar.

NECDC asayamung: Nagaland-i run 21 agi Sikkim kokogo



Imliwati nem Player of the Match naroküm agütsüba sülen tangokba noksa nung angur.

Dimapur, Monupii/May 12 (TYO): 3buba NECDC Senior Men's Interstate Friendship Tournament 2025 nung May 12 nü Nagaland Cricket Stadium, Dimapur nung Nagaland aser Sikkim na asaya Nagaland-i run 21 agi kokogo.

Asaya nung Nagaland nungi asayar Imliwati-i batting aser bowling naprongla nung kanga junga shilem agia team takok dangi ania liasü.

Mezüng batting amenba sülen Nagaland team-o over 39.4 nung asayar ajak out sür run 120 yanglua liasü.

Nagaland atema Imliwati-i

run 27 aser Yugi-i run 22 yanglu, koba run ishika dang süaka mezüngbuba innings atema kanga tongtibang liasü.

Sikkim nungner bowler tem rongnungi Ankur-i over 9 nung run 37 agütsür wicket 3 agi, Lee Yong Lepcha-i over 7.4 nung run 12 agütsür wicket 2 agi, Bijay Prasad-ia wicket ana agi aser Bhim Luitel-ia over 4 nung run 18 agütsür wicket 2 agia liasü.

Sikkim nungner bowler temi kanga junga asaya-a Nagaland team nem run 120 dang yangludakja liasü.

Asaya akoksü atema run

121 nungdaka asaya tenzükbä sülen Sikkim nungner asayartemi over 43 nung asayar ajak out ser run 99 dang yanglua liasü.

Parnok rongnungi Arun Chettri-i run timtiba yanglua pai ball 81 nung run 34 yanglua liasü.

Nagaland team atema Imliwati-i over 10 nung run 10 agütsür wicket 4 agia liasü. Asaya nung Nagaland team nungi run timtiba dang yangluba masü saka bowling kanga junga ona wicket 4 tashi agiba sülen Imliwati nem Player of the Match naroküm agüja liasü.

Virat Kohli Test cricket asaya nungi anisüngzüker



Monupii/May 12, 2025 (Agencies): India nung nüngtugu batsman Virat Kohli-i Hombarnü pa Test cricket asaya nungi anisüngzükbä sangdongogo. Captain Rohit Sharma Test asaya nungi anenba sülen anogo ishika dang lir Kohli-a iba telemtetba agiogo.

Kohli shiba mezüngbuba 2011 küm asaya liasü, pai Test asaya nung century 30 yangluogo aser Test asaya 123 dak tema nung run 9,230 yangluogo. Pa indang average 46.85 lir. Ajisüaka pa one-day internationals nungbo maneni asayatsü imlar.

Arishi küm 36 tain asayar ya taoba küm India-i West Indies nung 20-over World Cup tanabuba akokba sülen asaya nungi anena liasü.

"Ni test cricket nung küm 14 tejakdang mezüngbuba baggy blue semer asaya. Ni iba format

nung papika ya asayatettsü ta mimlai liasü," Kohli-i Hombarnü Instagram nung post sütsü.

"Iba asaya ajanga ni tendangogo, yanglushitsüogo aser lesson aika sayuogo, koba ni taküm tepeyong benshitsü.

"Ni iba format nungi atsüginginba ya temela masü, saka shitak ama bilemer. Ni takokba tashi ajak agütsüogo aser iba asaya yagi kü nema ni imlaba dang nungi tali meyipa agütsüogo.

"Ni temulung nung tenüngsang agi sünger asaya toktsür. Külem asayartem ajak dang kanga pelar. Ni kü indang Test career ya menürema bilemtettsü," ta pai ashi.

Kohli ya England nungner Joe Root, Australia nungner Steve Smith aser New Zealand nungner Kane Williamson nungner den par putu nung batter tajungtiba rongnung ka züngshir

aser pai Test nung century 30 yangluogo.

India nungner rongnungia Sachin Tendulkar, Rahul Dravid aser Sunil Gavaskar nungeri dang Kohli dang nungi Test asaya nung run timba yanglur lir. India nungner captain tem rongnungi pai century timba yanglur lir.

Kohli tatemsa January ita Australia 3-1 agi makokba asayamung nung asayaogo. Pa ya 2014 nungi 2022 tashi India Test captain liasü.

Kohli lenisüba nung India team-i test 68 nungi 40 koka pa ya iba format nung takok tajungtiba anguba captain lir. Pa ya alima nung captain tem rongnung test timtiba akoker rongnung pezübuba lir.

Graeme Smith (53), Ricky Ponting (48) aser Steve Waugh (41) nungeri dang captain ama pa dang nungi test timba koka liasü.

Kohli captain asüba mapang India team-i asaya 17 dang mekoki liasü aser pa lenisüba nung 2021 küm mezüngbuba World Test Championship final tonga asaya saka New Zealand makok.

2023 küm World Test Championship final tanabuba nunga pa team nung dena liasü saka Australia makok.

League European leg atema India tetsür hockey team sangdongogo

Monupii/May 12, 2025 (Agencies): Hockey India-i Hombarnü sangdong ka ajanga FIH Pro League 2024/2025 European leg atema India tetsür hockey team sangdongogo. Iba team ya Salima Tete lenisüba nung asayatsü.

FIH Pro League 2024-25 European leg ya London, Antwerp, aser Berlin nung June 14 nungi 29 tashi asayatsü. Iba asayamung nung India team Australia, Argentina, Belgium, aser China den anabenben asayatsü. India team mezüngbuba asaya Australia den June 14 nü asayatsü.

Team ya Salima Tete lenisüba nung asayatsü aser asayar tejen Navneet Kaur vice-captain asütsü shimogo.

Chief coach Harendra Singh-i, India tetsür team tawa Australia nung oa asaya pongu asayaba dak ajemdaker asayartem shimogo. Iba asayamung nung India team-i asaya ka akok aser pezü mekoki liasü.

Team indang jembiba mapang Harendra-i, "team kanga liromedema shimogo, kong asayar tejentem aser asayar tasentem densema lir. Pro League nung European leg ya kanga tongtibang lir aser alima nung team tajungtibatem den kanga toktepa asayatsü imlar. Team nung shima aliba asayartem ajaki tawa camp agiba aser Australia nung oa asayaba mapang bendanga agüja asayaba aser renema aliba sayuogo," ta ashi.

"Bhubaneswar nung Pro

League asayaba mapang team tashi aser temetongshitsü alibatem jangjaogo. Onoki item ya kanga süoki ia agiogo aser team asayaba jenjang ajungkettsü tetzüraba lir. European leg ya onok tekolok shisatsü aser tactical discipline tendangba mapang ka asütsü. Onok nükjidongji asaya ajak nung team ama renloka aotsü atema lir," ta pai shisem.

Bhubaneswar leg nung India team-i asaya ana akok, ana draw asü aser pezü mekoki liasü.

India team-i asayamung kanga junga tenzüka England 3-2 agi akokba den draw süa tenzü. Iba sülen India team-i taruba asaya asem makok aser 1-0 agi Germany koka liasü. Tatemangbuba asaya ana nung India-i 2-4 agi Olympic Champions Netherlands makok aser iba sülen tanabuba asaya nungbo goal 2-2 agütsür asaya tembangba sülen shootout asayaba koka liasü.

FIH Pro League European Leg atema India tetsür hockey team:

Goalkeepers: Savita, Bichu Devi Kharibam

Defenders: Sushila Chanu, Jyoti, Suman Devi, Jyoti Singh, Ishika Chaudhary, Jyoti Chhattri.

Midfielders: Vaishnavi Vitthal Phalke, Sujata Kujur, Manisha Chauhan, Neha, Salima Tete, Mahima Tete, Lalremsiami, Sunelita Toppo, Sharmila Devi

Forwards: Navneet Kaur, Deepika, Deepika Soreng, Sakshi Rana, Beauty Dung Dung, Baljeet Kaur, Rutuja Pisal.

Shaun Tait Bangladesh bowling coach kümogo

Monupii/May 12, 2025 (Agencies): Taoba mapang Australia nungner pacer Shaun Tait, Bangladesh bowling coach asütsü Bangladesh Cricket Board (BCB)-i Hombarnü shimogo.

Arishi küm 42 tain Tait ya team nung iba ita tatemlen adentsü. Pa den küm ana atema tenangzüktepba yangluogo aser pa 2027 küm November ita Cricket World Cup asayaba tashi coach mapa abentsü.

New Zealand nungner Andre Adams melena Tait shimogo. Tait ya head coach Phil Simmons kübok inyaktüsü.

"Bangladesh cricket team den densemtsü atema tang mapang tajung lir. Iba ya international cricket lir aser development team ka masü aser ajaki asayartem nungi takok imlar, koba fast bowling telok den kü nükjidong asütsü aser ajak dang alia team asoshi takok bener arutsütsüji kü nükjidong asütsü," ta Tait-i ashi.

"Phil Simmons den inyaktüsü maongka anguba ya jangrademtsüka lir aser külemi

inyakyonga aotsü yomgya atar," ta pai shisem.

Bangladesh team tawa Zimbabwe den Test asaya 1-1 nung tembang aser taruba itatem nung United Arab Emirates, Pakistan and Sri Lanka den asayatsü lir.

Tait ya alima nung bowler tem rongnung ball takaratiba aonba asayar ka lir aser pai Australia team nungi 59 ben asayaogo aser iba mapang wicket 95 agia liasü. Pa 2007 küm World Cup akokba team nunga densema liasü.

Tait taoba mapang Pakistan, West Indies Test team aser Afghanistan team indang bowling coach liasü. Pa club balala nunga inyaka arudar, kong Bangladesh Premier League (BPL), Big Bash League (BBL), Pakistan Super League (PSL), Lankan Premier League (LPL) aser English County Cricket nung shilem agiba densema lir.

Tait ya BPL season tatemsabuba nung Chittagong Kings indang Head Coach liasü aser 2012-13 season nung pa iba team nungi asaya liasü.

BILEMDANGANG

"Na magizükba tesem nung mapang tintok."